


# ROBE BA ME LWATAKA

 Mu vwandaka kaka na pasteur. Mu vwandaka tuba . . . Mu lombaka yandi mazono na kubokila munu. Mpe mu me mona kaka, munu . . . Kilumbu ya muvimba, ya vwandaka na ata mbokolo mosi ve, mpe mu banzaka, “Mbote, mu ke kukiyufula wapi dyambu? Kima ke . . . Nyonso kele swi.” Mpe na manima ya mwa ntangu fyoti, Mpangi ya kento Wood me kwiza kuna na diboko mosi ya bambokolo. Alo-alo ya munu vwandaka simba mbote ve, na yawu, kana mosi ya beno vwandaka bokila. Alo-alo vwandaka dila, kasi ya vwandaka wakana kuna ve, na yawu dyambu vwandaka kuna na standale. Ba yidikaka yawu na kutala mazono na nkokila na ngunga ya nana, to mu banza mwa fyoti na ntuala ya yina, mpe, alo-alo, bambokolo ke na kulata na ntangu yayi.

<sup>2</sup> Beto kele na kyese na kuvwanda na lukutakanu na suka yayi. Mu kele na miyoyo ya ngolo, yina mu ke kuzwaka ntangu mu ke vutukaka na yinzo. Mu tambulaka na kati ya mvula ya mpembe yina vwandaka tii na luketo ya munu, mu lalaka na ngaanda na mpimpa. Mu banza na yawu ve ntangu mu ke vwandaka ntama na awa, kasi kaka mu ke sabuka mongo yina kuna na New Albany, ya kele nyonso yina beno fwana sala, samu na kukota na kiwanda yayi, kuna mu ke kuzwa miyoyo ya ngolo. Mpe ya kele . . . Mu zaba ve, ya kele na kima kaka na kiwanda awa yina ke simbaka yawu. Mpe ya kele yisi, mpe ya ke wisana na munu ata fyoti ve.

<sup>3</sup> Ntangu yayi, beto kele na kyese na kuvwanda na dibuundu, mutindu mu vwandaka me tuba, mpe kuvwanda na kuwa pasteur ya beto ya luzolo ya mbote yina ke pesa ndombolo ya beto, mpe na Mfumu Yesu. Mpe—mpe na kuwa, mawa na kuwa bantu mingi ke na kubela mpe ke na nsatu, mpe mutindu dyabulu ke na kusalaka na bunene muntu nyonso kubela.

<sup>4</sup> Mpe mama mosi ya fyoti me telama pene ya mpangi ya yandi ya kento kuna na manima, mpe mu zaba ti Mpangi ya kento Sauer yina kele kuna vwandaka kuna na yandi. Dokotolo me fidisa yandi na yinzo samu na kufwa ntangu yayi. Mpe yandi ke na kukwikila dyaka ti yandi ke beluka. Mpe yandi kele na dyambu ya mpasi mingi, kieleka ya mpasi mingi. Bokilo ya munu ya kento, mutindu mosi, ya bamvula makumi sambwadi na ntangu yayi. Yandi kele na mpasi mosi ya nene ya kieleka. Mpe ya kieleka bimbevo mingi na kati ya yinsi. Mpe na yina ya kele na Mpeve-Santu na kati ya yinsi, beno me mona, yina ke belusaka bimbevo ya beto, kana beto lenda kuzwa kaka lemvo na Yandi.

<sup>5</sup> Mpe ntangu yayi, na yina ti laka ya munu ke na kusala mpasi, mpasi ve, kasi ya ke na kutatika. Mpe mu ke meka ve na kulonga,

kasi mu kuzonza kaka na beno mwa ntangu fyoti na Ndinga, mpe na manima kukota na kusambila samu na bambevo, yina mu silaka na kusala. Kasi kaka ntete mu sala yayi, mu ke zola kusamuna mwa balukutakanu dyaka. Mu . . .

<sup>6</sup> Na balukutakanu ya munu mu kele na mutindu mosi ya mwa kukondwa kuwisana ya . . . kukondwa kuwisana ve, kasi kaka mwa kukondwa luzabu. Mpe bambala mingi, mu—mu kele ve na bima samu na kusamuna balukutakanu ya munu, mutindu—mutindu bampangi yankaka ya babakala na bilanga ya kusamuna, mutindu na ladyo mpe televizyo, mpe bamagasine mpe nyonso yina. Mpe na kusalaka mutindu yina, mbote, muntu ke tuba, “Mpangi Branham ke vwanda awa.” Ntangu yayi ba me samuna mu ke vwanda na bisika tatu samu na sabala yayi, kaka bubu yayi, bisika tatu ya kuswaswana. Mosi kuna na Kentucky, zole na Californie, yina mu me zaba. Mpe ya kele na kima ve yina beno lenda sala samu na yawu, samu ti mu kele ve na mutindu yankaka ya kusamuna, na yawu ya ke salaka yawu mutindu mpasi.

<sup>7</sup> Mpe, yinga, kana ya kele na muntu mosi me katuka kuna na Madisonville, na Kentucky, awa. Ba samunaka ti mu ke vwanda kuna sabala me luta, mpe mu vwandaka zaba kima mosi ve samu na yawu. Mpe mu vutukaka na yinzo, mpe—mpe bawu samunaka yawu; mpe mpangi ya bakala yina salaka yawu, nkumbu ya yandi kele Epply’s. To, mu banza ti ya vwandaka nkumbu ya yandi. Yandi salaka yawu, na lukwikilu nyonso ya mbote. Yandi bokilaka munu mpe yufulaka kana beto lendaka kulumuka kaka na—na kuvwanda lusakumunu mpe kuzwa lusakumunu ya bantu ya yandi. Mpe yandi bokilaka. Mu tubaka na yandi na kuyufula Mpangi Moore. Mbote, na yina, mu zolaka kwenda. Mu tubaka na yandi ti mu zolaka katuka kilumbu kaka yina. Mbote, Mpangi Moore lembanaka na kuzabisa bantu nyonso. Mpe na ntangu, to kuzabisa munu, to kuzabisa kento ya munu. Na yawu mu vwandaka na Idaho, mpe vwandaka me vutuka kaka, mpe lukutakanu vwandaka me banda.

<sup>8</sup> Na yawu, mpe na yawu mu me mona, na kati ya yina, ti kukubika mambu na Louisiane samu na bima yina kele awa lenda simba ve. Na yawu, mu me baka kaka ntwadusulu ya kukubika munu mosi, samu na kukubika balukutakanu munu mosi, tii balukutakanu ya munu ke . . . Mu ke kaka mutindu . . . Oh, mu zaba ve, mu banza ti funguna kele mbote samu na moyo. Beno ke banza mutindu yina ve? Mu vwandaka me lembisa mingi na yina me tala bima yayi. Mpe na kubikaka kaka muntu nyonso, na kisika nyonso, kusala kaka na mutindu nyonso. Mpe mu ke mona ti, yawu ke futaka ve. Na manima ya ntangu ya yinda, beno ke tula . . . Beno fwana vwanda na sysiteme mosi samu na yawu. Mpe ntangu yayi mu ke na kumeka na kukubika.

<sup>9</sup> Mpe mu—mpe mu ke mona Mama Arnold. Mu . . . Ya kele na muntu awa na Louisville yina me vwanda mbote mingi, ntangu

mu vwandaka na balukutakanu awa, mpe nkumbu ya yandi kele Mpangi Burgum. Mpe yandi vwandaka sosa nkokila mosi to zole, ya lukutakanu. Mu ke mona Teddy ya yandi ya fyoti ya kento, mu banza, Teddy Arnold. Na mwa ntangu fyoti na sabala yayi.

<sup>10</sup> Mpe na yina Sabala mpe Lumingu yina ke kwiza, kana mu lenda, kana Mfumu kuzola, mu zola kuvwanda kuna na Madisonville. Bawu kele na milongi makumi zole na tanu, to makumi tatu kuna. Bawu nyonso ya kuvwanda kuna, me katuka mwa. . . Mosi vwandaka bakilometele yivwa na ndambu, to bakilometele kumi na mosi na ndambu. Mbote, muntu mosi ve kuna, na yawu vwandaka kuna ve, mpe ya kele foti ya munu ve, kasi mu kaka. . . kasi kaka kukondwa lubakusu, to kubika kubokila yandi. Mpe mu ke meka na kuvwanda kuna weekend yina ke landa, kana Mfumu zola.

<sup>11</sup> Na yina, na tanu tii sambanu, mu kele na Brooklyn, na New York. Mpe kuna na manima, na kumi na yiya, na kumi na tanu, mpe na kumi na sambanu, na Parkersburg, na Virginie ya Weste. Mu kubikaka kaka balukutakanu zole yina mazono na nkokila mpe na suka yayi. Ntangu yayi, na Charlotte, na Caroline ya Sude, ya kele kwandi na liste, kasi mu zaba ve. Na yina, bakonze ke na kwiza.

<sup>12</sup> Na manima beto ke kwenda na Simu ya Wesete, kisika ba ke na kukubikaka oditolyome mosi ya nene ya lukutakanu. Ntangu yayi, yayi kele—kele balukutakanu ya fyoti na balukolo ya kitezo ya zole mpe bima ya mutindu yina. Yina ke salama kuna na Simu ya Wesete, ke vwanda bambanza zole, lukutakanu ya kiwisa ya bambanza, ya Oakland mpe San Francisco.

<sup>13</sup> Mpe dyaka delegasyo ya Phoenix, samu ti Mpangi Roberts lenda vwanda ve kuna mvula yayi, Mu ke sala mutindu kubaka kisika ya yandi na Phoenix, na—na lukutakanu ya muvimba ya kizunga ya Maricopa. Yina kele ngolo ya kimvuka.

<sup>14</sup> Mpe beno sambila samu na munu samu mu—mu ke na nsatu ya yawu. Mpe mu me bakula ti konso ntangu lukwikilu ke baka kisika ya yawu, dyabulu ke balula minduki nyonso ya difelo mbala mosi na zulu ya yawu, mutindu yina, beno me mona, na yawu yina ke salaka yawu mpasi mingi.

<sup>15</sup> Na yawu, na suka yayi, samu na kusambila samu na bambevo. Mu ke zola kutanga Ndinga mosi ya Nzambi ya Seko, mpe kuzonza kaka mwa ntangu fyoti na Masonuku, mpe na manima kusambila samu na bambevo. Oh, mutindu mu zola kuzonzila na Yandi! Beno ve? Mu zola kaka kuzonza na yina me tala Yandi.

<sup>16</sup> Ntangu yayi mu zola kutanga na Biblia, ya Zole ya Rois na kapu 2, na nzila ya 12, kitini ya yawu.

*Mpe Elie monaka yawu, mpe. . . bokaka, Tata ya munu, tata ya munu, bapusu ya Israel, mpe minati-mpunda ya yawu.*

17 Mpe ntangu yayi samu na dilongi, to yintu ya dilongi, mu zola kuzonzila na: *Robe Ba Me Lwataka*. Na yawu ti Mfumu kubwela balusakumunu ya Yandi na yina beto ke zonza na beno na suka yayi. Mpe beno vwanda na kati ya kusambila samu na beto.

18 Na ntangu yayi ya luyalu ya Israel na yinsi. Israel vwandaka yinsi, mpe ya vwandaka yinsi mosi ya ngolo, mpe ya vwandaka na kutala ntangu mosi ya ngemba na kati ya lweka ya basoda ya yandi. Kasi na lweka ya yandi ya kimpeve, ya vwandaka mutindu ntangu mosi—mosi ya—ya bilanda-landa. Mpe kana beto tala na manima na Ngwisani ya Ntama, beto lenda tala bifwani ya yina ke na kusalamaka bubu yayi. Ntangu nyonso, na kati ya Biblia, bima yina kele ntangu yayi, kele kaka bima ya kuswaswana na yina vwandaka na mbandukulu.

19 Ntangu yayi, Buku ya Genèse ke sala nyonso yina kele na yinza bubu yayi. Ya kele ve na kima na yinza kasi yina bandaka ve na Genèse, samu ti ya kele mbandukulu. Na kati kuna, bandaka konso isme. Na Genèse, kubandaka nyonso yina kubandaka. Mpe Dibuundu ya kieleka bandaka na Génèse. Mpe mukwikidi ya luvunu bandaka na Genèse. Mpe luswaswanu bandaka na Genèse. Genèse vwandaka kubanda.

20 Mpe ntangu yayi na ntangu ya luyalu ya Elie, to na nzyetolo ya Elie awa na zulu ya ntoto, yandi vwandaka profete ya Nzambi na ngunga yina.

21 Mpe ata mbala mosi ve Nzambi me bikaka samu na Yandi mosi na zulu ya ntoto kukondwa mhangi. Nzambi kele na ntangu nyonso, na kisika mosi, na mwa kisika, ke vwandaka na muntu yina Yandi lendaka tula maboko ya Yandi na zulu mpe ke telama mutindu mhangi. Na yawu kana Yandi salaka yawu, kubanda Genèse, na mbatukulu, ya kieleka, kisika mosi, Nzambi kele na muntu yina Yandi lenda tula diboko ya Yandi na zulu na ntangu yayi. Samu ti Yandi—Yandi kele na mingi kulutila muntu mosi ntangu yayi, Yandi kele na bantu mingi na yina Yandi lenda tula diboko ya Yandi na zulu, samu beto me kuma na ntangu ya kuvukisa, ntangu ya kuyonzika.

22 Genèse vwandaka kukuna ya nkuna, mpe bamvula mafunda sambanu yayi me vwanda na kukula ya bambuma. Mpe ntangu yayi nkuna me kuma nkuna yawu mosi. Ya kumaka fololo, mpe na fololo na—na mbuma. Mpe ntangu yayi ya me kuma ntangu ya kuvukisa, ntangu ya kuyonzika, bima nyonso ya nene yina bandaka. Dibuundu ya kieleka yina bandaka na Genèse me kuma na ntangu ya mbuma, mbuma ya Kimpeve. Mpe mbeni ya Klisto yina bandaka na Genese me kuma na mbuma ya yawu. Mpe beto me kuma kaka na ntangu ya nsuka ya kilumbu ya yinza yayi, . . . ya bantu yina ke kufwa. Mpe beto kele. . . Ya kele ntangu ya kulutila nene yina muntu nyonso, to mosi na bansungi nyonso, me zingaka ntete, ya kele ntangu yayi. Ya kele ntangu ya kuningana. Ya kele ntangu ya mpasi samu na misumuki, kasi

ya kele ntangu ya mbote samu na Miklisto, samu beto zaba ti beto ke—ke na kukangaka, to ke na kuvukisaka mwa bangolo ya nsuka kintwadi, samu na kukwenda na Yinzo mpe kukutana na Mfumu.

<sup>23</sup> Ntangu yayi bantu, bubu yayi, mutindu beno ke tala bisika nyonso mpe ke mona mpasi ya nene mpe kyadi ke kutana yinsi, kisika . . . Bampimpa fyoti me luta, mu vwandaka solula na muntu mosi, yandi vwandaka mosi ya mikengi yina ke kengilaka awa, mpe bawu tubaka, “Mpangi Branham, ba me longa beto na luyalu na kulonga dyaka bantu ve na kulala na lweka . . . ntama na nela na yisi, kana bombe kubula, to na kukwenda ata mbala mosi ve na yisi ya yinzo, samu ti bombe ya malu-malu yayi bawu lenda twadisa yawu na ladyo katuka Moscou tii Bala-bala ya Yiya na Louisville, mpe kubula mbala mosi na bala-bala, kukubula yawu, ya kele na . . . bima na kati ya yawu, ke pasukaka, mpe ke baka yawu mafunda *mingi*, mafunda *mingi*, ya kutwadisa na bambwetete mpe radar, mpe kulosa yawu ya kieleka na Bala-bala ya Yiya na Louisville, katuka Moscou, na Russie, mpe ntangu ya ke bula kuna, beno kele na nsatu ya kusadila mpepo ve to kima mosi, kufidisa kaka yawu *kuna*, mpe ya ke kwiza suka kaka *awa*, mpe ya ke tobula dibulu na ntoto, na kisika yina, na mudindu ya bametele makumi tanu na tatu na bametele kumi na tanu bisika nyonso, bametele kumi na tanu.” Ya kele ve na kima ya kusala kasi beno yilama na kumata na zulu, ya kele kaka kima ya kusala ntangu bantangu yina ke kwiza.

<sup>24</sup> Beno banza kaka, bawu lenda kubula makumi tanu ya yawu, to nkama mosi ya yawu, na mbala mosi, kana bawu zola. Nyonso ke suka, na kati-kati ya ntangu ya . . . Mu banza ti ya kele na baminuti makumi samanu to makumi nana, to kima mosi, to na basekonde—basekonde, mu zola tuba, katuka kuna tii awa, samu na kubeba nyonso ya kima kusalama. Ya ke vwanda ve na kima yina ke bikana na kati-kati ya Louisville na Henryville, mpe na kati-kati ya Louisville mpe—mpe Bardstown, to kuna na yisi, kasi dibulu mosi na kati ya ntoto na kikunku ya putulu na kati ya yawu. Ya kele nyonso yina ke bikana, na ngaanda ya bisika yina ya ke pasuka, mpe ya ke yokama bakilometele mpe bakilometele mpe bakilometele na zulu ya yawu. Mpe na yina mosi ke na kubwa kuna, mosi yankaka ke na kubwa kisika yankaka, samu na kukutana na yawu.

<sup>25</sup> Mu kele na kyese ti beto kele na Kiswamunu. “Nkumbu ya Mfumu kele Yinzo ya yinda ya ngolo, muntu ya kudedama ke kota na Yawu mpe ke vuuka.” Ata lutangu ya babombe to lutangu ya bima yankaka yina . . . Beto ke vuuka Kuna. Na yawu, yinza mpe musumuki, na kuvwandaka ve na Kiswamunu yayi, to Kisika yayi ya lukengolo, ya kele ntangu ya kuningana. Mu banza, kana mu vwandaka Muklisto ve, mu zolaka kuma kilawu, samu na kubanza na yina lendaka salama na ntangu nyonso. Mpe na yinzo mosi ya kufuluka na bana ya fyoti, mpe nyonso yina, mu

zolaka zaba ve yinki kusala. Kasi mu kele na kyese ti mu lenda vwanda na yinzo ya munu mpe kulakisa na bawu Kiswamunu kisika ata bombe lenda simba ve, to kima yankaka, na yisi ya nkebolo ya Mapapu ya Mfumu Yesu. “Na nzila ya ngolo ve, na nzila ya ngolo ve, kasi na nzila ya Mpeve ya Munu,” me tuba Mfumu. Beno me mona? Beno tala yina kele nkebolo ya beto.

<sup>26</sup> Mpe wapi ntangu ya nene, ya nkembo ya kele, na kuzaba ti masumu nyonso mpe bampasi mpe bankwamusu mpe bakumekama ya luzingu ke suka ntama mingi ve. Yawu nyonso ke manisa mosi ya bilumbu yayi, mpe beto ke kwenda na Yinzo na kuvwanda na Mfumu. Ntangu yayi, yina me bikana kele ntangu ya kulonga Nsangu ya mbote mpe kukotisa na Yinzo ya yinda yayi lutangu, mingi ya bantu mutindu beto lenda.

<sup>27</sup> Mpe dyaka, mutindu beto ke mona kifwani ya dilongi ya beto bubu yayi, na Elie, na ntangu ya yandi, yandi. . . to, nzyetolo ya yandi na zulu ya ntoto, mbote, yandi vwandaka muntu ya nene, ya ngolo. Nzambi vwandaka sadila yandi na mutindu ya ngolo, na lulendo ya ngolo. Mpe beto ke tala ti na ntangu yayi, ya vwandaka na nkonga mosi ya bantu ya bilanda-landa yina vwandaka meka na kulanda Elie, bayina vwandaka meka na kusala bima mutindu mosi Elie vwandaka sala.

<sup>28</sup> Mpe na yawu beto ke tala kima mutindu mosi bubu yayi; kilanda-landa ya Buklisto, bantu yina ke meka na kusala mutindu Miklisto, yina ke meka na kusala bawu mosi Miklisto. Beno lenda sala yawu ve. Nzambi fwana sala yawu. Yandi kele Yandi Yina kaka lenda sala yawu.

<sup>29</sup> Na yawu bawu salaka lukolo, mpe bokilaka yawu, “lukolo ya baprofete.” Mpe bawu nyonso kwendaka na lukolo ya baprofete, mpe ba longaka bawu. Mpe mu lenda banza na milongi nyonso yina na zulu kuna, yina vwandaka lwata mutindu mosi ya kazaka yina Élie vwandaka lwata. Mu lenda banza na kumeka kulanda yandi na ndinga na yandi, na mutindu yandi vwanda zonzaka. Mpe—mpe mutindu yandi kukitalisaka yandi mosi, muntu nyonso vwandaka meka na kusala kima ya mutindu mosi, samu Elie vwandaka muntu mosi ya nene yina Nzambi vwandaka sadila.

<sup>30</sup> Mpe beto ke mona kima mutindu mosi bubu yayi. Mu vwanda kuwa luzabusu mosi na ladyo, ntama mingi ve. Ba kele na ba-Billy Graham bisika nyonso na yinsi yayi, kubanda Billy kwendaka na Louisville. Muntu nyonso ke na kumeka na kulanda-landa kima mosi, ke sana nsuki ya bawu na kutala mutindu mosi, mpe—mpe ke lwata mutindu mosi, mpe mutindu mosi ya ndinga, mpe nyonso yina. Kasi beno lenda sala yawu ve. Beno fwana vwanda kaka yina beno kele mpe yina Nzambi salaka beno na kuvwanda. Ya kele kieleka. Mpe na yawu beto ke tala mutindu ti, mu banza, na bilumbu ya bawu kima mutindu mosi kusalamaka.

<sup>31</sup> Ntangu yayi, Nzambi, na kumonaka, na ntwala ti bilumbu ya Elie vwandaka tangama, ti yandi vwandaka na lutangu mosi ya ntangu yina yandi zolaka vwanda awa na zulu ya ntoto, mutindu bantu nyonso kele na yawu. Na yawu, Yandi zolaka kuzwa mulandi samu na Elie. Mpe ntangu Yandi salaka yawu, Nzambi bokilaka muntu yayi. Yandi vwandaka ve na seminere mosi ntangu Yandi bokilaka yandi. Yandi vwandaka bundula na bilanga, na kizitu na ngombe, yina vwandaka sala kisalu, to vwandaka kipe mama ya yandi mpe tata ya yandi. Mpe Nzambi bokilaka yandi na kuvwanda mulandi ya Elisée, to Elie.

<sup>32</sup> Ya lendaka vwanda ti mingi na lukolo yina vwandaka banza ti bawu vwandaka ya kulunga ti bawu zolaka vwanda mulandi ya yandi, bawu zolaka lwata robe ya yandi ntangu kaka yandi zolaka manisa na yawu.

<sup>33</sup> Kasi, ya kele Nzambi ke bokilaka. Ya kele Nzambi ke salaka nsodolo. Ya kele Nzambi ke salaka kusoola. Ya kele Nzambi ke sungikaka nyonso. “Nzambi me sungika Dibuundu: bayankaka, bantumwa; bayankaka, baprofete; bayankaka, milongisi; bayankaka, bimwangisi-nsangu; mpe ba-pasteur.” Nzambi ke salaka yawu, Yandi mosi. Beto lenda ve kusala nsuki mosi ndombe to mpembe, to dyaka beto lenda kubwela kima mosi na ntela ya beto na kubanzaka. Nzambi, na lemvo ya Yandi ya kukondwa nsuka, mpe na nzila ya nsodolo ya Yandi mpe luzabu ya Yandi ya ntete, sungikaka bima yayi, mpe konso pine ke tambula kaka mbote. Mu zola yawu.

<sup>34</sup> Mu ke vwanda muntu ya kunyonga, na suka yayi, kana mu vwandaka kwikila ve na kusoola mpe mbokolo ya Nzambi. Kana mu banzaka ti yinza yayi kubikanaka samu na ndandu ya yawu, na ngolo ya muntu, mpe na ndwenga ya muntu, mpe na “bayiya ya nene,” mpe N.U., mpe yina ke tubaka ata mbala mosi ve Nkumbu ya Nzambi, mu zolaka vwanda muntu ya kunyonga. Kasi mu ke na kutalaka na yina ve samu na nsuka.

<sup>35</sup> Mu ke tala na kati ya bapaze ya Buku yayi ya ntama *awa*, kisika Nzambi sonikaka Yawu, mpe nyonso ke salama kaka ya kieleka mutindu Yandi tubaka yawu, mpe yimeni. Na yawu, kima kaka samu na munu na kusala kele kutandama na bawu ve, kasi kutandama na Calvaire. Kutandama na Nzambi, kutandama na Ndinga na Yandi, kuvwanda na kati ya Ndinga ya Yandi. Ata mutindu ya ke talana ya ke na kwenda lweka *yina*; ya ke kwenda mutindu Nzambi zola ya vwanda. Ya lenda vwanda kima yankaka ve. Samu ti, Yandi na kuvwandaka ya kukondwa nsuka, zabaka nsuka kubanda mbandukulu, mpe Yandi ke sala nyonso kukwiza na lukumu ya Yandi. Ya kele kieleka.

<sup>36</sup> “Bima nyonso fwana sala kintwadi.” Bima nyonso fwana vwanda ya kuzenga mbote na kisika ya yawu. Oh! Kana ya ke sala ve kikesa na kati ya Muklisto! Kima mosi ve lenda kwenda na yimbi. Na manima ya nyonso, ya kele mvita ya beto

ve; ya kele ya Yandi. Ya kele ndwenga ya beto ve; ya kele ya Yandi. Kima kaka mosi beto zolaka sala kele kutula lukwikilu ya beto mpe kutula kivuvu kuna, mpe kuvwanda swi mpe kumona nkembo ya Nzambi, beno mona mutindu Yawu ke kwenda na kisika ya Yawu, mpe konso pine ke sala. Ya lendaka vwanda ya kumwangana na lweka na lweka, kasi Yawu ke kota mbala mosi na kisika ya Yawu ya kulunga ntangu Nzambi ke zonza Ndinga.

<sup>37</sup> Yandi zabaka nsuka kubanda mbandukulu. Yandi zabaka ti yandi ke soola. Yandi zabaka ti Élisée ke baka kisika ya Élie, ntete kwandi yinza kusalama. Nyonso fwana sala kaka ya kieleka na mutindu ya kulunga.

<sup>38</sup> Mpe beto ke na boma samu na baya beto ya luzolo, mpe nyonso yina, “Bawu ke kota kwandi?” Bankumbu ya bawu, kana ba sonikaka yawu na Buku ya Luzingu ya Mwana-dimeme, ntete mbandukulu ya yinza, bawu ke kota mbala mosi na kati kuna. Ya kele kaka yina yandi lenda sala. Beto ke pesaka kimbangi mpe ke lezimaka Nsemo. Nzambi ke salaka yawu, Yandi yina ke nata Yawu na bawu.

<sup>39</sup> Ntangu yayi beno tala, na Elie, na ntangu yina, na manima yandi me losa robe ya yandi na zulu ya yandi, mpe yandi me meka yawu na zulu ya yandi. Na nzonzolo yankaka, Elie profete, yina vwandaka na kazaka ya Nzambi na zulu ya mapeka ya yandi, yandi kulumukaka mpe tulaka yawu na zulu ya Élisée, kisadi-bilanga, samu na kumona kana ya lendaka simba na yandi. Mpe ya bakaka pene ya bamvula kumi samu na kusoba, na kulunga kazaka yina.

<sup>40</sup> Beno zaba, Nzambi bantangu mingi ke kotisaka beto na ateliye mpe ke zenga beto. Ntangu yayi, Yandi sobisaka ve robe ya yandi samu ya lunga Élisée; Yandi tuba na Elisée na kulunga robe. Mpe ya kele yina Yandi ke na kusalaka bubu yayi. Yandi ke soba beto na kulunga robe, ve robe na kulunga beto. Bantangu yankaka beto ke zolaka kusala robe kulunga beto, kasi beto lenda sala yawu ve. Beno fwana (bika) beno mosi, kusoba, samu na robe. Ya kele robe ya Nzambi, mpe Yandi salaka yawu ya kulunga. Mpe beto kele. . . Yandi fwana nata beto na kisika yina, samu na kusala robe kulunga beto.

<sup>41</sup> Na yawu, beto lenda vwanda ve ya kulunga, beto mosi. Beto zaba ti beto lenda ve. Ya kele ve na mutindu samu na beto na kuvwanda, mpe, dyaka, Yandi tubaka samu na beto na kuvwanda. Na yawu, kasi, yina Yandi salaka, Yandi salaka munkayulu samu na beto; Mfumu Yesu Klisto mpe ludedomo ya Yandi. Ya kele kisika kulunga ke kwizaka; na kubikaka busantu ya beto mosi, ya yina kele na beto ve; mpe mabanza ya beto mosi, yina zolaka vwanda ve. Kasi beto ke pema swi na zulu ya kisalu ya kumanisa ya Mfumu Yesu. Nzambi fidisaka Yandi na ntoto, mpe ya vwandaka na kati ya Yandi ti beto ke pema.



42 Beno tala, bamvula nyonso yayi, na mutindu beto me zaba, yandi vwandaka kaka na mbotika mosi yina ya robe yina vwandaka na zulu ya yandi. Kasi na nzila ya bamvula, Nzambi me bongisa nkadulu ya muntu na kisika mosi, na manima ya mbokolo ya yandi, ti yandi ke lunga robe mpe kuvwanda kisadi ya Mfumu.

43 Mpe kuna ntangu Elie lutaka mpe losaka yawu na zulu ya yandi, mpe bawu bandaka na kutambula na Gilgal mpe bisika mingi yankaka bawu kwendaka, na lukolo ya baprofete, na nzila ya bawu, na kuzyetaka. Mpe, na nsuka, Elie vwandaka meka na kuvutula Élisée. Beno talaka yawu? Yandi vwandaka meka na kuvutula yandi. Yandi tubaka, “Mu . . .” Na mutindu yankaka, “Mu banza ti nzila kele mwa mpasi mingi samu na nge, mwana. Mu banza ti ya kele mwa fyoti mingi samu na nge na kutambula.”

44 Beno zaba, kisika Elie vwandaka, ya vwandaka kusungama. Mpe kisika nyonso kisadi ya kieleka ya Nzambi ke longa Nsangu ya mbote, ya kele ya kusungama, ya kele Nsangu ya mbote ya kukondwa mvindu kisika ba ke longa Yawu.

45 Mbote, kilumbu mosi, yandi kwendaka kuna na lukolo ya baprofete, na kutala bawu, mpe ba lombaka yandi na kukwenda. Bawu tubaka, “Ya kele mingi ya kusungama awa, samu na beto.”

46 Yina beto kele na yawu nsatu bubu yayi kele Nsangu mosi dyaka ya mbote, ya kusungama ya kulonga yina ke kaboka blé na mpusu, to mbote na yimbi. Kubokila yina kele mbote kele “mbote,” mpe yina kele yimbi kele “yimbi.”

47 Bantu nyonso yayi na kimbangi ya bawu, mpe na nyonso yina bawu vwandaka! Bawu fidisaka kima ya kudya, mpe mosi ya bawu kuzwaka vinu ya mfinda, mpe lokotaka banteete ya mfinda, mpe lambaka mwa lufwa na kati ya nzungu ya bawu ya bisyelo. Mpe, kima ya ntete beno zaba, bawu bokaka, “Lufwa kele na nzungu!”

48 Kasi Elie, na kitini ya bambala zole, zabaka yinki ya kusala, na yawu yandi tulaka diboko ya faline na nzungu. Yandi tubaka, “Ntangu yayi beno kwenda na ntuala mpe beno kudya yawu.” Na nzonzolo yankaka, bawu . . .

49 Bubu yayi, kifwanukusu, mu ke banza, ti beto kele na ba-Methodiste mingi, ba-Baptiste, ba-Presbyterien, ba-Luthérien, ba-Pentecotiste, mpe nyonso yankaka, nyonso ya kuvukisa kintwadi, mpe mosi ke telemina yankaka. Mpe beto kele ve na nsatu ya kukabuka na kima ya muvimba mpe kukatukila yawu. Beto kele na nsatu ya diboko yankaka ya Faline. Beno bumba dibuundu mosi.

50 Faline katukaka na yinzo ya lukolo kuna, ya vwandaka dikabu ya faline yina bantu nataka, mpe bambuma ya ntete ya kubuka bambuma yina vwandaka na ntoto na bambuma yina vwandaka sala konso mbuma ya faline. Mpe kuna ntangu . . .

<sup>51</sup> Faline yayi, na kuvwandaka mutindu mosi, vwandaka kifwani ya Klisto. Faline kele luzingu. Mpe ntangu kifwani ya Klisto, faline, vwandaka ya kunika mutindu mosi; zola kutuba, “Yesu Klisto mutindu mosi mazono, bubu yayi, mpe kukondwa nsuka.” Mpe faline na munkayulu ya faline, mpe ntangu bawu ke tula faline yayi na kati kuna, na kukotisaka Klisto na lufwa nataka Luzingu. Ya kele yina ke sala luswaswanu na mutindu ya beto ya kufwa, na baluswaswanu ya beto, na kuswana ya beto ya mabuundu mpe nyonso yina. Kana beto lendaka nata kaka Klisto na kati ya yawu, ya ke soba lufwa, mpe nkabwani, na Luzingu, kana beto lendaka sala kaka yawu.

<sup>52</sup> Ya kele na mafuku kumi na yivwa ya ba-Baptiste na Amerika. Ya kele na mafuku kumi na tatu ya ba-Méthodiste na Amerika. Ya kele na mafuku kumi na mosi ya ba-Lutherien na Amerika. Mpe mafuku kumi ya ba-Presbytérien na Amerika. Mpe Nzambi kaka zaba yikwa Bakatolika, bawu yina me lutila ba-denomination nyonso yankaka. Kasi, na nyonso yina, yinki beto ke na yawu nsatu? Diboko mosi ya Faline. Beto kele na nsatu ya kunata Luzingu na dibuundu. Mpe Klisto kele Luzingu. Yandi kwizaka samu na kunatila beto Luzingu.

<sup>53</sup> Na yawu, bawu vwandaka na kuswana ya bawu, mpe balukolo ya bawu, mpe ya bawu theo...ba-théologie, mpe nyonso yina.

<sup>54</sup> Mpe kuna Élie tubaka na Élisée, “Nge ke sala mbote na kuvutuka, samu ti nzila lendaka vwanda mwa mpasi.” Kasi muntu ya Nzambi yina mbala mosi kutanaka yawu, to na yina ba me losaka robe ya ludedomo ya Nzambi mpe ya ngolo na zulu ya yandi, ya kele pete-pete ve na kuvutuka manima.

<sup>55</sup> Ntangu mu vwanda me kuwa pasteur kutuba, na suka yayi, ti ya beto... “Bantu mingi ke na kulemba.” Yina beto kele na yawu nsatu, mpangi, kele na kikesa! Yina beto kele na yawu nsatu kele kuzwa kikesa, ya kele kieleka. Bakumekama lenda kwiza. Beto kuzwaka ata mbala mosi ve nsilulu ya kuluta na yawu ve, kasi Yandi ke pesa lemvo na kuluta na kati ya yawu. Kana mongo kele mingi zulu na kukwenda kuna, mudindu mingi na kukwenda na yisi, nene mingi na kwenda lweka nyonso ya yawu, Yandi ke pesa lemvo na kuluta na yawu. Ya kele kieleka. Beno vwanda kaka na boma ve, kasi beno bika meso ya beno na zulu ya Klisto, samu ti Yandi kele Yandi yina kaka lenda lutisa beto.

<sup>56</sup> Ntangu yayi, beto ke mona bawu mutindu bawu ke landila na kuziyeta, ke kuma na lukolo. Mpe yandi tubaka, “Nge vwanda awa ntangu yayi. Vwanda awa, mpe vwanda mulongisi mosi ya mbote ya théologie, mpe nyonso yina. Mpe nge kukondwa ntembe, kilumbu mosi, lendaka kuma kuluntu ya lukolo ya nene awa. Kasi mu fwana kwenda mwa ntama fyoti.”

<sup>57</sup> Beno lenda banza ti muntu ya Nzambi ke sepela na kuvwanda kuluntu ya lukolo ya nene, na yina Ngolo ya

Nzambi vwandaka kaka kuna kisika nyonso yandi vwandaka ya kutelama? Ve, tata. Yandi tubaka, “Na yina Mfumumu kele moyo mpe moyo ya nge kele moyo, mu ke bika nge ve.” Mu zola yawu.

<sup>58</sup> Beno vwanda na yawu, ata kulemba, ata mpe ya me katuka na mama ya beno, tata ya beno, to na pasteur ya beno. Beno vwanda na Yandi.

<sup>59</sup> Na Jourdain ba kwendaka. Ba sabukaka kuna. Mpe Elie tubaka, “Ntangu yayi, yinki nge zola mu sala samu na nge?”

<sup>60</sup> Yandi tubaka, “Kitini ya mpeve ya nge bambala zole kukwiza na zulu ya munu.” Yandi zabaka ti yandi vwandaka na kisalu ya kusala. Yandi tubaka, “Kitini bambala zole.” Ve kaka kimbangi mosi ya mbote ya tiya, ve kaka kupesana ya maboko ya mbote, to kubundana ya mbote na bayankaka ya dibuundu. Kasi, “Yina mu zola kele kitini ya bambala zole ya yina kele ya kulutula mbote ntangu yayi.”

<sup>61</sup> Mu ke tuba na beno, ntangu Nzambi ke tulaka muntu samu na kisalu ya yinza, yandi fwana vwanda na kima ya kulutula mbote na yina kele na yinza. Yandi fwana vwanda na kima ya kulutula mbote na yina kele na dibuundu. Yandi fwana sosa kitini ya bambala zole.

<sup>62</sup> Mpe kana ya me vwandaka ntete na ntangu yina kitini ya bambala zole kele mfunu, ya kele bubu yayi, na bitezo ya nene ya bantu; kima ya kulutula mbote, kima ya kulutula zulu. Mu lenda ve. . . Mu banza ti madeso mpe dimpa ya masangu kele kieleka mbote, kasi bantangu yankaka mu fwana tanda diboko fyoti mingi na zulu. Mpe beto ke salaka yawu; beto fwana. Beto fwana landila na kumata. Israël vwandaka vutuka manima kana yandi landilaka na kuvwanda na zulu ya ntoto mosi. Yandi zolaka landila kukwenda na ntwala to kuvutuka manima. Mpe ya kele mutindu dibuundu kele.

<sup>63</sup> Na yawu, na yina bawu vwandaka kwenda, ya kumaka ve kasi na mwa ntangu fyoti tii yandi tubaka, “Nge me lomba kima ya nene, kasi, na mutindu nyonso, kana nge mona munu na ntangu mu ke kwenda, nge lenda kuzwa yina nge me lomba.”

<sup>64</sup> Ntangu yayi, yina zolaka vwanda motifi mosi, ntima mosi, meso na kima mosi, kukanga meso ya beno na nsilulu. Hum! Kana beno kele ya kubela na suka yayi, kana beno kele na mpasi, ya kele na nsilulu mosi ya nene; na nzila ya Elie ve, kasi na Nzambi Yandi mosi. “Kana beno lenda kwikila, na ntangu beno ke sambila, beno kwikila ti beno me kuzwa yina beno me lomba, mpe beno ke kuzwa yawu.” Ata yina dokotolo me tuba, ata mutindu *yayi* ke sala to *yina* ke sala; beno kangama beno mosi na nsilulu.

<sup>65</sup> Elie pesaka yandi kondisyo, “Kana nge mona munu ntangu mu ke kwenda, ya ke kwiza na zulu ya nge.”

66 Ya kele na nsilulu, “Kana nge lenda kwikila, nyonso lenda salama na bawu yina ke kwikila.”

67 Bantangu yankaka mu ke talaka munu mosi, mpe mu ke banzaka, “Mu me vwanda meduze na luzingu ya munu. Mu vwanda vingila, mpe mu me kondwa mafunda mingi ya myoyo, na Kimfumu, samu ti mu vingilaka mpe tubaka, ‘Nzambi . . .’ Mu vwanda vingila mingi na dikabu ya kimpeve. Mpe mu tubaka, ‘Mfumu, kana Nge lenda lakisa kaka munu, kana Nge lenda pesa munu vision ya yinki ya kusala.’” Mpe Nzambi pesaka vision, na yina mu ke baluka mpe mu ke bika muntu kuzonzila munu kima yankaka.

68 Mpe, oh, mu me kuma ntete ve na kisika yina, ntete, tii mu . . . mutindu mu kele na yawu ntangu yayi, ti mu ke kuwa ti ya kele lukwikilu, ti beto fwana basika kuna, samu ti ya kele nsilulu. Mpe bima yina Yandi me sala, mpe bakubeluka yina Yandi me sala, mpe bimangu; na yina, me kulumuka mpe me baka foto ya Yandi na lweka ya beto, mpe nyonso yina, yina me zabana ntete ve tuka yinza me banda. Mpe kuna kutelama mutindu meduze? Ya ke lembisa nzutu mpe munu mosi. Ya me kuma ntangu ya kukanga meso ya beno na nsilulu.

69 Mpe ya kele, na lemvo ya Nzambi, mu kuzola sala. Mpe mu zaba ti konso mpeve ya yimbi ya difelo ke bula na yawu. Kasi, na lemvo ya Nzambi, mu zola kukanga meso ya munu na nsilulu.

70 Élisée tubaka, “Kana nge,” to, Élie tubaka, “Kana nge mona munu ntangu mu ke kwenda, nge ke kuzwa yina nge me lomba.” Ya kele kieleka. Beno fwana kanga meso ya beno na zulu ya yawu; kutala mbote na nsilulu. Mutindu, yinki zolaka salama kana na lukolo, kana yandi vutuka, mpe tubaka, “Hé, babakala, wapi mutindu mu ke sala ntangu yayi, mu ke landa kaka ya profete na manima?” Yandi zolaka kondwa, mu banza. Kasi yandi kipeke ve yina lukolo vwandaka banza, to yina milongisi nyonso vwandaka banza. Yandi kipeke ve yina bamfinangani vwandaka banza, to bayinzo, to bayina vwandaka tala yandi. Yandi kangaka lukwikilu ya yandi na nsilulu.

71 Yina beto kele na yawu nsatu bubu yayi kele lukwikilu na nsilulu ya Nzambi, mpe kusala ve atasyo na yina *yandi yayi* ke tuba to *yandi yina* ke tuba.

72 Mutindu mpangi mosi ya bakala tubaka, mulongi mosi vwandaka na bana ya bakento zole yina vwandaka bababa, mpe bantu ke tongaka kubeluka ya Kinzambi, tubaka ti, “Bana yina zolaka beluka ve.”

73 Beno landa ve kutonga. Beno kanga lukwikilu ya beno na nsilulu. Nzambi tubaka yawu! “Kisambu ya lukwikilu ke belusa bambevo, mpe Nzambi ke telemisa bawu.” Kana Yandi lenda nata kifwa-makutu mosi na kuwa, Yandi lenda nata kifwa-makutu yankaka na kuwa. Beto zaba, na nzila ya kidimbu yina ke kubwaka ve, ti Yandi ke salaka yawu. Beto kanga lukwikilu

ya beto na nsilulu. Meso ya beto na kima mosi; makutu ya beto na kima mosi; bantima ya beto na kima mosi; mpe, na kima mosi, na Yesu Klisto, mpe Yandi kele na lenda ya kulasa yina Yandi silaka. Oh, ntangu beto ke banza yawu, ya ke soba dyambu nyonso ntangu beto ke bakula yawu. Nzambi salaka nsilulu. Nzambi vwandaka Yandi yina tubaka yawu.

<sup>74</sup> Ntangu yayi, *awa* vwandaka na kimonikisi ya Nzambi yina tubaka yawu, mpe ntangu yayi Nzambi Yandi mosi me tuba yawu. Na yina yinki beto lenda sala? Kima yankaka ve kasi kukanga mabanza ya beto na zulu ya yawu. Yandi tubaka, “Kana nge mona munu ntangu mu ke kwenda, nge lenda kuzwa nsilulu.” Élisée kanga meso ya yandi na Élie. Ata yina ba vwandaka boka na lweka nyonso, yina vwandaka salama na bisika nyonso, yina salamaka na ntwala ya yawu, yandi talaka ata mpe ve na yawu. Yandi kangaka meso ya yandi na nsilulu. Beno bawu yayi, meso ya beno na nsilulu.

<sup>75</sup> Mu ke banza na mama yina beto kwendaka tala kilumbu yankaka yina na nkokila, Mpangi ya kento Sauer. Mpe dokotolo tubaka na yandi mutindu mpasi ya yandi vwandaka yimbi. Mpe mu tubaka na yandi ata mbala mosi ve; mu tubaka na bankundi ya yandi ya luzolo. Mpe wapi mutindu ya lendaka salama ve samu na yandi na kukuma mbote. Ntangu yayi, mpangi, mwana ya bakala ya yandi ya bakala yufulaka munu na yina me tadila yawu. Mu tubaka, “Kana yandi lenda kanga meso ya yandi na nsilulu.” Ata nyonso yina ke salama, beno kanga meso ya beno na nsilulu.

<sup>76</sup> Mwa basabala me luta, Mpangi ya kento Wood awa, mpe Mpangi Wood, bankundi zole ya beto ya ntima awa na dibuundu. Mu vwandaka na Michigan na bankundi ya munu, Leo mpe Gene. Beto katukaka na lukutakanu ya Chicago mpe kwendaka na bayankaka ya bantu ya bawu, na...samu na bilumbu zole, samu na kwenda zomba mvudi na makonga mpe matolotolo. Mpe na nzila ya munu ya kuvutuka, kento ya munu simbaka munu, mpe yandi tubaka, “Sambila samu na mama ya Mama Wood. Cancer ke na kudya kizizi ya yandi.” Mpe yandi tubaka, “Mu me monaka ntete ve Mpangi ya kento Wood mawa mutindu yina. Yandi ke na kudilaka.” Mpangi ya kento Wood ke vwandaka ntangu nyonso munungi ya lukwikilu, tuka Nzambi belusaka mwana ya yandi ya bakala na dikulu mosi ya kikata, mpe belusaka yandi na Tuberculose, mpe nyonso yina. Kasi yandi lembaka.

<sup>77</sup> Kuna na kivinga, na nkokila yina, beto sambilaka. Na kukwizaka, Mama Wood tubaka, “Mpangi Branham, beto ke kwenda kuna.” Mpe beto kwendaka na mama ya yandi, yina vwandaka na Louisville. Mpe yandi vwandaka na cancer na lweka ya mbombo ya yandi, mpe dokotolo vwandaka simba-simba yawu, yandi mwangisa yawu; tii ya vwandaka talana mutindu musanga na lweka ya mbombo ya yandi, mpe vwandaka

mata pene ya basentimetele zole na ndambu na disu ya yandi, mukwa vwandaka talana kaka kuna. Ya vwanda kudya kaka yawu na nswalu mutindu ya lendaka kudya.

<sup>78</sup> Mu kotaka na kivinga, mpe mu fukamaka. Mu tubaka, “Mu zola kuzonza na yandi mosi.” Mpe mu ke kotaka na kivinga samu na kusambila na kento yina. Mpe na yina na kati ya kivinga, mu banzaka, “O Nzambi, kana Nge lendaka lakisa kaka munu vision ya yina ke salama na kento yayi.” Tata mpe Mama Wood vwandaka ya kuvwanda na ngaanda, vwandaka vingila kumona yina vision zolaka tuba.

<sup>79</sup> Kasi na ntangu mu vwandaka kuna, mu me kuzwa kubedisa. Mu kuzwaka kubedisa na kuvingilaka vision. Ya monanaka mutindu ti Kima mosi vwandaka vutula munu na kubanza, “Ya vwandaka ve mbokolo. Na yinki nge ke sosa vision, ntangu nsilulu kele yimeni ya kutuba?” Na yawu mu fukamaka mpe sambilaka. Mpe na ntangu mu vwandaka sambila, kima mosi kangamaka na kati, lukwikilu ya nsilulu.

<sup>80</sup> Na kubasikaka. Mpe Mama Wood, ntangu mu tubaka na yandi yawu, yandi tubaka, “Nge vwandaka me mona kima mosi, Mpangi Branham?”

<sup>81</sup> Mu tubaka, “Ya kieleka mu me mona kima mosi ve, kasi mu me kuwa Kima mosi yina me tuba na munu ti nsilulu ya Yandi kele kieleka mpe Yandi ke sala yawu. Mpe mu ke kwikila ti Yandi ke sala yawu.”

<sup>82</sup> Mpe na yisi ya bangunga makumi zole na yiya, yintu ya cancer yina bandaka na kukabuka mpe kukawuka kusalamaka na zulu ya yawu. Ba-cancer ke kawukaka ve, mutindu beno zaba, kana ti ya kele ya kufwa. Mutindu yina ya vwandaka kuna na ntangu yina. Mpe kento yayi me beluka, mpe kele na yinzo. Wapi Klisto ya kitoko! Na kukangaka meso ya beto na nsilulu! Nzambi tubaka yawu!

<sup>83</sup> Kasi ntangu ba ke sambidila beto, bantangu yankaka, beto ke kwenda mpe ke tuba, “Mbote, ya me salama kaka ve na mbala mosi, na yawu mu banza ti beto ke sala mbote na kuvutuka dyaka.” Oh, ve.

<sup>84</sup> Beno kanga meso ya beno na nsilulu. Nzambi tubaka yawu, yina ke sukisa dyambu. Yimeni. Kana Nzambi tubaka mutindu yina, Nzambi kele na lenda ya kukangama na nsilulu ya Yandi, to Yandi ke sala yawu ata fyoti ve.

<sup>85</sup> Abraham bokilaka bima yina, yina vwandaka ve, mutindu ti ya vwandaka. Mpe, bamvula makumi zole na tanu, yandi telemaka na zulu ya yina lenda salama ve, samu yandi tangaka ti Nzambi vwandaka na lenda ya kusala yina Yandi silaka. Amen. Mpe beto kele bana ya Abraham, na lukwikilu.

<sup>86</sup> Ya kieleka, Elie kangaka meso ya yandi na zulu. . . to Élisée na zulu ya Élie, mpe na yina bawu vwandaka kwenda na ntuala.

Mpe na manima ya mwa ntangu fyoti, kipusu kwizaka mpe kabukisaka bawu, mosi na lweka mosi mpe yankaka lweka yankaka, mpe kuna yawu kumatisaka Elie. Na zulu. . . Yandi mataka na chariot mpe yandi kwendaka na zulu, mpe katulaka robe ya yandi na mapeka ya yandi mpe losaka yawu na Elisée. Samu ti, Élisée kulaka na kati ya yawu, beno zaba, na yawu ya lungaka yandi mbote. Mpe beno lenda banza. . .

<sup>87</sup> Oh, mu zola ti beno pesa munu atasyo ya beno nyonso, na yina mu ke kuwa laka ya munu kutatika. Mu zola kuyufula beno kima mosi.

<sup>88</sup> Beno lenda banza mutindu Élisée kuwaka ntangu yandi lokotaka robe yayi, me tula yawu na zulu ya dipeka ya yandi? Oh, wapi mutindu ya kuwa na nzutu!

<sup>89</sup> Mu zola ve kutuba yayi samu na munu mosi, kasi pene ya bamvula kumi me luta, na chaire awa, mu longaka na dilongi mosi; David, kinwani na lanse na diboko ya yandi, mpe Goliath na ntwala ya yandi. Na bilumbu yina ya vwandaka ve na ba-campagne ya kubeluka na bilanga ya kulonga, kisika mosi ve, mutindu beto me zaba. Mpe, oh, mutindu bantu vwandaka tonga kubeluka ya Kinzambi! Kasi ya vwandaka na kima, na manima ya kukutana na Moyo mosi. Mpe ba-pasteur tubaka na munu ti mu vwandaka zimbisa mabanza ya munu, ti ya lendaka vwanza ve mutindu yina. Kasi, na chair mosi yayi awa, mu longaka na zulu ya David. Mu tubaka, “Beni zola kutuba na munu ti yayi, basoda ya Nzambi ya moyo, ke bika Philistin ya kukondwa nzengolo yina kutelemina basoda yayi?”

<sup>90</sup> Mwa mwana mosi ya mapeka ya kubwa, na bansuki ya kubaluka ya kulwata kazaka ya mpusu ya kibulu, mpe lanse na diboko ya yandi; na basoda nyonso ya Israel yina me vwanza, na manima. Mpe yandi, mosi, kwendaka. Na muntu, na—na lanse ya bametele tanu na ndambu ya yinda, mpe kima na ntonono ya yawu vwanza peze bakilo mingi ya basikle, mu banza ya vwanza bakilo kumi ya bisengo, na meno, lanse ya bametele sambanu na kima, na misapi ya basentimetele makumi tatu na tanu yinda.

Mpe na kutala David vwanza peze bakilo makumi yiya na tanu, mpe telamaka, vwanza mata mpe kubwa, mutindu nsusu ya bakala yina kele na makulu ya kutengama, mpe tubaka, “Nge zola kutuba na munu,” oh, la la, “ti beno ke bika Philistin ya kukondwa nzengolo yayi! Kana yandi vwanza na kisika ya yandi, ti yandi vwanza, kasi yandi ke na kutelemina basoda ya Nzambi ya moyo.” Oh, la la, wapi munungi! “Mpe beno nyonso kele na boma ya kukwenda nwana na yandi?” Yandi tubaka, “Beni bika mu kuzwa yandi.” Oh, la la! Yandi tubaka, “Nzambi ya Mazulu salaka munu kufwa nkosi na lanse, Yandi salaka munu kufwa ulusu na lanse, mpe bambala yikwa dyaka Yandi ke

pesa Philistin ya kukondwa nzungo yina na maboko ya munu!"  
Ya kieleka.

<sup>91</sup> Mpe ntangu ba kuzwaka lunungu ya ntete, mpe ti ba tulaka Goliath na yisi, basoda nyonso ya Israel landaka David. Mpe bawu zengaka bayintu mpe bulaka, Israel. . .to bulaka ba-Philistin na ntoto ya bawu mosi. Ba vutulaka bawu na bansongi, mpe kufwaka bawu, mpe bakaka bambanza ya bawu, mpe nyonso, mpe kuzwaka lunungu.

<sup>92</sup> Mpangi ya bakala mpe mpangi ya kento, kima mutindu mosi me salama na bitezo ya kimpeve, ntangu bawu tubaka, "Kubeluka ya Kinzambi lenda salama ve. Bilumbu ya bimangu me luta." Kana bilumbu ya bimangu me luta, bilumbu ya Nzambi me luta. Dibuundu yina ke kwikilaka ve na kimpeve na nsuka ke kufwa, mpe Nzambi ke bika dibuundu yina. Ya kieleka! Mpe Nzambi pesaka nsilulu, mpe bansilulu ya Nzambi kele Seko.

<sup>93</sup> Awa ntangu fyoti me luta ntangu mwa bana ya bakento vwanda sakana na radium, mpe vwanda kotisa yawu, mpe vwanda lenga radium na maboko ya bamontele. Mu kele na ndambu na yandi yayi. Mpe mwana kento mosi salaka kyeta mpe yandi bakaka kikombo mpe kotisaka yawu na yinwa ya yandi. Ya kufwaka yandi. Mpe bamvula mpe bamvula na ntwala, ba nataka ba-microscope mpe tulaka yawu na zulu ya mukwa ya yintu ya kento yina, mpe bawu lenda dyaka kuwa kutambula radium yina, "Burr-burr-burr." Ya kele kukondwa nsuka. Ya ke landila na kusala, ke landila mpe ke landila. Ya ke sutope ve.

<sup>94</sup> Mpe, oh, mpangi, kana radium kele na mutindu ya kusala yina na beto, wapi mutindu ya kulutila ke vwanda ya kukondwa nsuka, Nzambi ya Ngolo nyonso, ya Seko, ya kimpeve, ya ngolo nyonso, ya kukondwa nsuka! Yandi fwana sala kisalu mutindu mosi mutindu Yandi bandaka. Yandi fwana vwanda na yawu nyonso, to Yandi kele ve Nzambi ya Ngolo nyonso, Nzambi ya ngolo nyonso. Yandi ke na kuingila dyaka na muntu kele na lukwikilu ya ngolo, yina ke basika mpe ke telemina mbeni na lufulu ya Ndinga ya Yandi mpe ke tuba ti Yawu kele kieleka.

<sup>95</sup> Mpe ntangu yayi yinki salamaka, na ntangu campagne ya nene ya kubeluka kubandaka? Na yina mafunda ya basoda, ya bantu ya Nzambi, yina vwandaka na mwa mabuundu, mutindu Oral Roberts, Tommy Hicks, mpe mingi ya bantu yankaka ya kulutila nene na bilanga ya kuonga, basisaka Mbele ya bawu mpe ba kwendaka. Mbele *yayi* yina ke zengaka na mantwala mpe na manima, na kumata mpe na kukulumuka, mpe na kukota mpe na kubasika, "Mufundisi ya mabanza, mpe ke kabulaka luku na mukwa." Bawu bendaka Babiblia ya bawu, Mbele ya bawu, mpe kwendaka, ntangu bawu monaka ti ya lendaka salama. Mpe beto me bula mbeni, na lemvo ya Nzambi, tii yinza ya muvimba me kuzwa reveil ya kubeluka. Ya lenda salama. Ba-pasteur ya fyoti bayina vwandaka na mwa mabuundu ya fyoti, mpe nyonso yina,



simbaka tiya mpe monaka vision, me basisa mbala mosi Mbele mpe me kwenda, mpe me telemina mbeni.

<sup>96</sup> Wapi mutindu beno zaba ti ya kele? Ya kele na bantu ya nene, muntu ya Congrès Upshaw, Ntinu George ya Angleterre, mpe bantu mingi ya nene yina vwandaka ya kubela mpe vwandaka na mpasi, me beluka na Ngolo ya Nzambi ya Ngolo nyonso. Na yawu ba lenda tuba kima ve na zulu ya yawu ntangu yayi. Ya me salama. Ya kieleka! Yandi vwandaka . . .

<sup>97</sup> Na yina Elie kwendaka. Na manima . . . Nsatu ya ntima ya yandi nyonso vwandaka kuzwa nsilulu yina. Yandi vwandaka zola nsilulu. Yina vwandaka bamotifi ya yandi. Yina vwandaka nyonso ya yandi. Yina vwandaka luzingu ya yandi. Yina vwandaka dibanza ya yandi, nyonso. Nyonso, bima nyonso, vwandaka ya kukangama na nsilulu yina.

<sup>98</sup> Mu kele ya kunatama na kundima ti beto kele ve ya kusungama samu na kima yayi ti beto ke na kuzonzila. Kana motifi ya beno ya muvimba, na suka yayi, kele ya kupema na zulu, “Kupesa Nzambi lukumu na kubeluka ya munu. Mu me ndima ti mu ke beluka na Ngolo ya Nzambi. Mu me ndima na kuzinga luzingu ya Muklisto. Mu me ndima na kutambula na ngemba na Nzambi. Mu me ndima na kusala yawu. Mu ke kipe ve yina mama ke tuba, yina dibuundu ke tuba, yina pasteur ke tuba, yina muntu nyonso yankaka ke tuba, yina yinza ke tuba. Mu me ndima yawu. Ya kele ntima ya munu mosi.” Na yina beno ke kuma kisika mosi.

<sup>99</sup> Na yina, ntangu Élisée kumonaka ti yandi ndimaka na kuzwa yawu, Elie monaka ti *Elisée* vwandaka ya kundima, yandi pesaka yandi nsilulu. Ntangu yayi, nsilulu vwandaka, “Kana nge lenda mona munu ntangu mu ke kwenda! Kana nge lenda mona munu ntangu mu ke katuka!” Ntangu yayi dyambu bikanaka na Élisée. Yandi zolaka kuwa nsilulu, na yawu yandi kuzwaka nsilulu. Ntangu yayi ya kele na “kana” na yawu. “Kana nge lenda mona munu ntangu mu ke kwenda!”

<sup>100</sup> Ntangu yayi, kana beno ke na kubela na suka yayi, mpe ti beno zola kubeluka, mu lenda siamisa na beno Klisto pesaka beno nsilulu. Nsilulu kele ya beno, “Kana beno lenda kwikila! Kana beno lenda kwikila!” Ti ba nunga beno ve.

<sup>101</sup> Ntangu yayi Élisée kufukaka robe ya Élie, profete. Wapi kutambula ya munungi! Mutindu yandi vwandaka tambula, na kukwendaka na Mazulu, mutindu munungi! Yandi kuwaka nsilulu. Yandi kuwaka ngolo. Yandi vwandaka tambula mutindu kinwani, kuna na Jourdain.

<sup>102</sup> Lukumu na Nzambi, nkundi! Konso mukwikidi, na suka yayi, yina me lwata ludedomo ya Klisto, ke tambula na Jourdain. Ya kele kieleka.

<sup>103</sup> Ti ba-bombe atomique kukwiza; ti ya kwiza, nzila nyonso. Beto me lwata robe mpe ke tambula, munungi. Amen. Mu . . .

“Beno vwanda na boma ve. Mu me nunga yinza.” Yinga, tata! Beno bambuka moyo na yinki? “Mu me nunga yinza.” Klisto tubaka yawu.

<sup>104</sup> Elie vwandaka tambula ya kulwata robe ba me lwataka, mutindu munungi, ya kieleka, na kukwizaka na Jourdain.

<sup>105</sup> Mpangi, beno bika mu tuba yayi samu na buzitu na beno. Beno lwata ve robe ya muntu yankaka yina ba me kudya na bapata ya bantembe, kisika bifu nyonso yayi mpe mabanza mpe kumata mpe kukulumuka me sala mabulu na yawu, mpe bawu ke na kubwa bisika nyonso. Beno lwata robe ya Munungi, Klisto. Beno sala kivuvu ve na dibuundu ya beno yina mbala mosi longaka mpulusu na nzila ya mbotika ya Mpeve-Santu, yina mbala mosi longaka kubeluka ya kinzambi mpe ntangu yawu ke manga Yawu, nyonso ba me kudya na bapata ya ntembe mpe nyonso yankaka. Beno lwata robe ya Yandi yina kondwaka ata mbala mosi ve mvita, samu ti beno kele na nzila ya beno na Jourdain. Amen.

<sup>106</sup> Ntangu yayi, yandi lwataka robe ba me lwataka, ya kele kieleka. Mpe bantu mingi na suka yayi kele ya kulwata barobe ba me lwataka. Kasi na ntangu yandi kwizaka na Jourdain, yandi bakulaka ti robe na yawu zolaka sala kisalu ve. Ya kele kieleka. Mpe dibuundu, Methodiste, Baptiste, Pentecotiste, Presbyterien, “Oh, beto kele na balukolo! Na. . . Oh, beto kele na malongi nyonso, ya Biblia, ya kuyidama. Beto kele na barobe nyonso ya kulunga, bansilulu. Beto kele na yawu nyonso. Oh, beto kele ya kubotama, ba me ndima beto. Mpe beto ke ya bantumwa. Beto kele ya kulwata lukwikilu ya bantumwa. Beto ke kwikilaka na kubeluka ya Kinzambi. Beto ke kwikilaka na Nzambi. Beto ke kwikilaka na Bangolo ya Nzambi. Beto me botama, na Biblia, mutindu Biblia ke tuba. Beto kuzwaka Mpeve-Santu. Beto zonzaka na bandinga. Beto salaka nyonso yina.” Kasi, mpangi, kana ya kele kaka kima yina beno kele na yawu nsatu, beno ke tala yina ke kondwa beno, mpe, ntangu beno ke kuma na Jourdain.

<sup>107</sup> Oh, ba lendaka longa beno. Beno lendaka vwanda na mayele mingi. Beno lendaka vwanda na D.T., Doctorat ya Théologie. Beno lendaka vwanda na D.Ph., Doctorat ya Philosophie. Beno lendaka vwanda na D.L., Doctorat ya Latin. Beno lendaka vwanda na ba-diplôme mutindu na mutindu. Beno lenda vwanda ya kulwata robe ya dibuundu ya ba-Methodiste. Beno lendaka vwanda ya kulwata robe ya dibuundu ya ba-Pentecotiste na zulu ya beno. Beno lendaka vwanda ya kulwata robe ya ba-Assemblée na zulu ya beno, to ya ba-Unitaire, to ya ba-Trinitaire, to nyonso yina ya lendaka vwanda. Ya kele kaka robe ba me lwataka, na kubanda, ya kele kieleka, ba-dogme yina bantu me sala, yina ba me sala, nyonso mutindu yina; mpe ata ti beno kele Muklisto, mpe ti dibuundu kele dibuundu ya Buklisto, mpe ti beno kele ya kulwata kieleka robe.

<sup>108</sup> Kasi ntangu Élisée, vwandaka ya kutelama, vwandaka ya kutala mbote, na bantu mingi ya kufuluka ya bapofete na simu mpe bavwezi, na kumonaka yina yandi zolaka sala, mpe awa yandi me kwiza, ya kulwata robe ya Elie, oh, la la, alleluia, yandi longokaka mutindu yankaka, yandi kuzwaka ndongosolo, yandi kele ya kutumama, yandi ke kwikila, ya kele ve na kima mosi ke tambula mbote ve na yandi, yandi ke kulumuka na Jourdain, yinza ke na kutala yandi mbote.

<sup>109</sup> O Nzambi, wapi mutindu beto kele na nsatu ya yawu bubu yayi! Na bantu longokaka mingi mpe bizabi yina kuzwaka ndongosolo; na bantu mingi yina lenda pasula Biblia yina mpe kutula Yawu kintwadi, na ba-mathématique; bantu mingi yina lenda sala bima ya nene na mutindu ya kulonga; yina zaba disolo ya Biblia na bitini nyonso, yina lenda tuba na beno ngunga ba vwandaka pelisa mwinda, mpe ngunga ba vwanda kufwa yawu. Bawu lenda tuba na beno bima nyonso yayi. Mpe bawu kele . . . Bawu kele na mbotika na maza. Ba kele na mbotika ya kimpeve, mutindu ba ke bokilaka yawu, robe. Ba kele kaka na nyonso ya kusungama.

<sup>110</sup> Mutindu mosi Elie salaka yawu. Kasi ntangu yandi kulumukaka na Jourdain, samu na kukutana na yinza ya muvwezi, yinki yandi bokaka? “Wapi Nzambi ya Elie?” Ya vwandaka ve robe ya Elie yina salaka yawu. Ya vwandaka Ngolo ya Nzambi ya Elie, yina salaka yawu.

<sup>111</sup> Mpe kima yinza kele na yawu nsatu na suka yayi kele Ngolo ya Nzambi ya Elie. Ya lendaka vwanda ti beno zonzaka na bandinga mpe bokaka, mpe kimaka na zulu ya dibaya. Kasi yina beto kele na yawu nsatu kele Ngolo ya Nzambi ya Pentecote, samu na kubasisa baluzingu mpe bima yina vwandaka zinga na kilumbu yina, na ngolo ya bantumwa.

<sup>112</sup> Robe yina ba me lwetaka vwandaka nyonso ya kulunga, kasi yandi vwandaka na nsatu ya mbokolo ya malu-malu na kati ya ntima ya yandi na Nzambi. Yandi vwandaka na nsatu ya kupakula ya malu-malu ya Nzambi. Yandi vwandaka ya kulwata robe ba me lwetaka ntangu yandi kumaka na nzadi, kasi yandi vwandaka na nsatu ya mbokolo ya malu-malu ya diboko ya ntete ya Nzambi, mpe diboko ya ntete ya Ngolo ya Nzambi, samu na kusala kimangu.

<sup>113</sup> Mpe, mpangi ya munu, beno vwanda ve na boma ya kulomba Nzambi kima mosi. Beno fwana kulomba Nzambi, to kulomba Nzambi, na kima nyonso yina Yandi me silaka. Samu ti, kana mu ke na kukotisa Nzambi yina kele yina kele na ngolo nyonso mpe ya ngolo nyonso, mpe kana mu kele kisadi ya Nzambi, mu fwana sala bisalu ya Nzambi. Mpe kana mu ke sala bisalu ya Nzambi, mu fwana lombamba Nzambi na kulungisa bima yayi, samu ti Yandi ke lombamba munu na kubasisa yina lenda salama ve. Mu fwana lombamba Yandi. Mu fwana bokila Yandi, mpe kutelama kuna

mpe kutuba, “Nzambi, Nge silaka yawu.” Mutindu mosi beno, muntu nyonso.

<sup>114</sup> “Beno ke kuzwa ngolo,” Actes 1:8, “na manima Mpeve-Santu me kwiza na zulu ya beno.” Na manima Mpeve-Santu me kwiza na zulu ya beno! Na manima beno me lwata robe ya Muklisto, na manima lukwikilu ya beno me vwanda na Klisto, kuna beno ke kuzwa ngolo. Yawu yina. Yinga.

<sup>115</sup> Mpe, mpangi ya bakala, mpangi ya kento, mosi na mosi ya beno, bika mu tuba yayi ntete kusambila bambevo, ti mu tuba yayi: Na lusalusu ya Nzambi, beno sambila samu na munu. Mutindu mu telemaka, bamvula kumi me luta, na estrade yayi, kulongaka na zulu ya David mpe Goliath, ntangu yayi ya kele Goliath ve yina ke kanga munu, Nzambi me kufwa yandi na ntwala ya munu, kasi kima yina ke kanga munu, kele kukondwa lukwikilu, kukondwa ya kima yina mu zabaka vwandaka.

<sup>116</sup> Mpe na suka yayi, na ntwala dyaka ya mwa tabernacle yayi, mu ke boka: wapi kisika kele Nzambi yina pesaka nsilulu yayi? Wapi kisika kele Nzambi yina kutanaka munu na yayi, kuna? Kwiza, Nzambi, mpe pesa munu kikesa. Pesa munu ngolo. Pesa munu dibanza ya kundima, ata nyonso yina ke kwiza to ke kwenda. Ata ti ya ke talana mpimpa, to ata ya talana. . . Ata mutindu ya ke talana, ya ke landila. Nsilulu kele kieleka.

<sup>117</sup> Mpe mpangi ya bakala, mpangi ya kento, mosi ya bilumbu yayi. . . Samu na beno bankundi misumuki awa na suka yayi, mpe samu na beno bantu yina ke meka na kulanda Buklisto, beno lendaka vwanda ya dibuundu, ya kele mbote mingi, mu lenda tuba dyambu ve samu na yawu, mu kele na dyambu ve na ndongosolo ya beno ya mbote ya lukolo, to dyambu na theologie ya beno, Mu kele na dyambu ve na yawu, kasi, oh, wapi kisika kele Nzambi?

<sup>118</sup> Ya vwandaka ve Elie, na manima ya nyonso. Ya vwandaka ve Elie yina zibulaka nzadi yina. Ya vwandaka ve robe ya yandi. Élisée bakaka yawu na dipeka ya yandi. Yandi bukaka yawu kaka mutindu Elie salaka. Kasi ntangu yandi bandaka na kumeka kuningisa yawu, Ngolo vwandaka kuna ve. Na yina yandi bokaka, na kuzabaka ti Nzambi vwandaka kisika mosi, “Wapi kisika kele Nzambi yina? Wapi kisika Yandi kele?” Na yina kima bulaka profete, samu yandi ningisaka robe yina mpe bulaka maza, mpe yawu kabukaka balweka zole. Mpe na ntwala ya banganga-Nzambi ya kilumbu yina, na ntwala ya bantu ya kuvwenza ya kilumbu yina, yandi sabukaka Jourdain, kaka mutindu Elie salaka na ntwala ya yandi.

<sup>119</sup> Beto kele na nsatu ya malongi ve; beto kele na yawu. Kasi beto kele na nsatu ya Nzambi ya Elie. Beto kele na nsatu ya Ngolo ya Nzambi ya Elie, na kuvutuka na dibuundu ya beto. Ngolo ya kusala yawu kusimba kuna, mpe kubokila Ndinga ya Nzambi, “Kieleka,” ata mutindu nyonso.

<sup>120</sup> Mpe beto kele, mosi na mosi ya beto awa na suka yayi, mutindu bantu ya moyo, na nzila ya beto na Jourdain. “Mpe ntangu yandi kumaka na Jourdain.” Beno ke kuma kuna, mosi ya basuka yayi to mosi ya bampimpa yayi.

<sup>121</sup> Ntangu yandi kwizaka na Jourdain, yandi vwandaka tambula mutindu munungi. Kasi, ntangu yandi kwizaka na Jourdain, yina vwandaka luswaswanu. Yandi vwandaka ya kulwata robe ba me lwataka. Muntu yankaka lwataka yawu. Kasi ya vwandaka robe ya mbote, mpe yandi zabaka muntu yina lwataka robe yina.

<sup>122</sup> Mpangi ya bakala, mpangi ya kento, mosi ya basuka yayi, mu fwana kulumuka kuna na Jourdain.

<sup>123</sup> Mu vwandaka banza. Na manima ya midi yayi, beto ke kwenda na Mpangi ya bakala mpe Mpangi ya kento Wright. Beno zimbana bawu ve. Yayi kele anivelsele ya makwela ya bawu ya wolo. Mu ke kwikila, dibuundu, bawu ke kuzwa madia ya midi na bawu. Mu vwandaka banza, kilumbu yankaka yina: bamvula makumi tanu! Mpe mu ke mona bawu zole, me kula mingi na bamvula mpe me lembe. Mu banzaka, “Yinga, mu me kuma na bamvula makumi yiya na sambwadi.” Ba kwelanaka kaka bamvula tatu ntete mu butuka.

<sup>124</sup> Makumi yiya na sambwadi! Mu ke na kutambula na ntwala ya Jourdain. Mu fwana kulumuka. Mu fwana kuma kuna. Mu ke kuma kuna. Ya lendaka vwanda na dikubu na nzila. Ya lendaka vwanda mu ke kubwa na zulu, na mpepo. Ya lendaka vwanda ba ke kubula munu, na mwa tiya ya diabulu kisika mosi kuna, mpe kufwa. Mu zaba ve mutindu mu ke kwenda. Kasi, ya kele na kima mosi mu zaba, mu ke kwenda, mpe mu ke na kukwendaka na Jourdain.

<sup>125</sup> Kasi ntangu mu ke kuma kuna, mu zola kuzaba kima mosi, ti mu kele ya kulwata robe ba me lwataka, mpe. Mu ke na kutula kivuvu na ya munu ve, samu ti ya kele mbote ve. Samu ti, kaka na ntangu Elie bakaka robe ya Elisée, yandi pasulaka na bitini ya yandi mpe yandi losaka yawu. Mpe ya kele mutindu ya vwandaka ntangu mu talaka Klisto. Mu kukipasulaka munu mosi, mabanza ya munu mosi, buzoba ya munu mosi, mwa kima mosi ya kukondwa mfunu. Mu banzaka, na ntangu mu vwandaka mulongi mosi ya fyoti, ya Baptiste, mu vwandaka kaka mutindu. . . mu vwandaka muntu. Kasi, mu pasulaka yawu; mu lwataka robe ya Yandi. Mpe ntangu mu ke kuma na Jourdain, mu zola kutala munu mosi ya kufuka robe ya Yandi. Yandi ke landa yawu. Mpe beto ke kuma kuna kilumbu mosi.

Kasi beto sambila kaka mwa ntangu fyoti.

<sup>126</sup> Tata ya Mazulu, na yina beto kele na nzila ya beto na Jourdain na suka yayi, mutindu minungi, mpe ya kele na kilumbu, beto fwana lakisa kima na Jourdain, ya kele, na

lufwa. Mpe, oh, wapi kima ya boma ya ke vwanda, nkabwani na Nzambi. Beto lenda zabuka ve. Ve. Kasi, Elie, na ntangu yandi kumaka kuna, yandi vwandaka na robe ya Elisée. . . robe ya Elie. Mpe ntangu yandi katulaka robe. . . ya Elie, muntu yina vwandaka mbote-mbote na ntwala ya Nge, mpe Nge ndimaka yandi mpe nataka yandi na Mazulu na Nge. Mpe Elisée vwandaka me lwata robe ya yandi, na yina yandi kwendaka tala na Jourdain, lufwa, robe ya Elie. Mpe ba ndimaka yawu, mpe Jourdain zibukaka, mpe yandi sabukaka.

<sup>127</sup> Nzambi ya luzolo, kilumbu, beto fwana kulumuka. Beto lenda lakisa ve bisalu ya beto ya mbote; beto kele na ata mosi ve. Beto lenda lakisa kima mosi ve na yinza. Mu ke na nsatu ya kima mosi ve, samu na kumeka na kulakisa, kasi mu ke na kivuvu ya muvimba na mangolo ya Yesu. Nge ndimaka Yandi, mpe vumbulaka Yandi na lufwa, mpe Yandi kunatamaka na Mvwandulu ya Nzambi mpe kuna ke vwanda kukondwa nsuka. Mpe, Nzambi, mu zola kulakisa yawu na Nge, ti mu ke kwikila na Yandi, mpe mu zola Yandi. Mpe, na lemvo ya Yandi, Yandi me lwatisa beto na robe ya Yandi. Mpe mu ke sambila, Tata, ti Nge ke sadisa beto ntangu yayi na bilumbu ya mvita. Mpe kisika bantu ya Nzambi fwana sala bisalu ya Nzambi, Mu ke sambila ti Nge ke bika beto kubaka robe ya Klisto, ngolo ya Mpeve-Santu, mpe kubokila Nzambi yina zingaka na kati ya Yandi. Pesa yawu. Na Nkumbu ya Klisto beto ke lomba yawu.

<sup>128</sup> Mpe na yina beto ke na bayintu ya beto ya kukulumusa. Mu ke kukiyufula, awa na suka yayi, kana ya kele na muntu yina ke meka na kutambula na Jourdain, kukondwa robe yayi. Kana ya kele na muntu yina kele ve na robe ya Yesu Klisto na zulu ya beno, mpe ata ti ya vwandaka ya kulwata mbala mosi na Mwana ya Nzambi. Mu ke kukiyufula, kana beno kele na yawu ve na suka yayi, kana beno zola kutelemisa maboko ya beno na Nzambi mpe kutuba, “Nzambi ya luzolo, na ngunga yayi, mu zola ntangu yayi kundima yawu.”

<sup>129</sup> Nzambi sakumuna nge, mama. Muntu yankaka ke, zola kutelemisa diboko ya beno? Nzambi sakumuna nge, mwana ya bakala. Muntu yankaka, lenda telemisa kaka diboko ya beno? Nzambi sakumuna nge, ntwenya ya bakala. Nzambi sakumuna nge, ntwenya ya bakala. Muntu yankaka zola kutelemisa diboko ya bawu? Nzambi sakumuna nge, kuna na manima, tata.

<sup>130</sup> Beno tuba kaka yawu, “Na lusalusu ya Nzambi, na suka yayi, mu zola yambula ludedomo ya munu mosi, mabanza ya munu mosi, mpe mabanza ya munu ya byese mpe ya ntangu ya nene, mpe masumu na yina mu me zingila. Mpe mu zola ti Klisto kutula robe ya Yandi na zulu ya munu, na suka yayi, ti mu ke sadila robe ya Yandi. Mu zaba ti Yawu kele ya kulunga.” Nzambi sakumuna nge, mwana. Muntu yankaka ke tuba, “Mpe mu ke telemisa kaka. . .”

<sup>131</sup> Beno telemisa diboko ya beno, beno tuba, “Mu ke zola ntangu yayi kundima Mpeve-Santu na luzingu ya munu. Mu ke zola kulwata robe ya Yandi ya ludedomo. Ntangu mu ke kuma kuna kilumbu yina, mu ke lakisa munu mosi ve mpe kutuba, ‘Mbote, ntangu yayi, Nge zaba ti mu sumbilaka muntu mosi ndambu ya makala. Mu salaka yayi.’” Ya kele mbote, ya kele kieleka mbote, kasi yina. . . Kima mosi fwanaka kufwa, samu beno zinga, mpe kaka na nzila ya kusalu yina beno lenda kuzwa mpulusu. Beno zola kutelemisa diboko ya beno? Kutuba, “Klisto, mu ke yambula ntangu yayi nzila ya munu. Mu me ndima nzila ya Nge. Mu ke zola ti Nge vwanda na kyadi na munu ntangu mu ke kuma na nsuka ya nzila?” Mbote mingi. Nzambi sakumuna nge, mama. Nzambi sakumuna nge. Mbote mingi.

Ntangu yayi beto ke sambila.

<sup>132</sup> Ntangu yayi, Tata ya Kusungama, ya Mazulu, mwa maboko sambwadi, nana, kumi me telama. Mu zaba ve mambu ya bawu. Nge zaba nyonso me tala bawu. Mu zaba ve. Kasi bawu kele na nsatu bubu yayi. Mpe bawu me zaba ti bawu kele na nsatu, mpe bawu zola kukwiza mpe kundima lusalusu na ntangu ya mpasi; na kumona ti, ngunga ya nene yina me kuma pene-pene ntangu yayi, ba-bombe atomique, bima ya nene ke na kuingila beto.

<sup>133</sup> Mpe mu ke sambila, Tata ya Mazulu, ti Nge ke sakumuna bantu yayi, mpe bubu yayi tula diboko ya Nge na zulu ya bawu mpe katula disumu ya bawu ya nko mpe ntembe. Mpe ti bawu losa ntama robe ya bawu ya ntama ya kudya na bapata ya munimi, kisika jelek mpe bampasu, mpe bapata ya mabanza mpe budibuundu, me kudya na kusalaka mabulu na yawu, mpe (yawu) ya ke simba bilumbu mingi ve. Ti bawu losa kaka yawu ntama, mpe tanda diboko mpe kuzwa robe ya Mfumu Yesu. Kutuba, “Mu ke na kivuvu na Yandi. Mu ke lwata munu mosi, ve na ludedomo ya munu, to ve na zulu ya mabanza ya munu mosi. Kasi, kubanda ngunga yayi, mu ke tula kivuvu na Nge.” Pesa ti bawu kuzwa yawu, Tata, samu ti beto me lomba yawu na Nkumbu ya Klisto. Amen.



*ROBE BA ME LWATAKA* KNG56-1125M  
(A Secondhanded Robe)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 25 ya Ngonda ya kumi na mosi, na mvula 1956, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na movimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)